

XIV

IN SEXTVM POMPEIVM CIVILE BELLVM RENOVANTEM

Asclepiadeo-Pherecratico-Glyconicus

Ō nāvis ! referent in mare tē novī
Flūctūs ? Ō ! quid agis ? Fortiter occupā
Portum. Nōnne vidēs, ut
Nūdum rēmigiō latus,

Et mālus celerī saucius Āfricō,
Antemnaeque gemant ? Ac sine fūnibus
Vix dūrāre carīnae
Possint imperiōsius

Aequor ? Nōn tibi sunt integra lintea,
Nōn dī, quōs iterum pressa vocēs malō.
Quamvīs Pontica pīnus,
Silvae filia nōbilis,

Iactēs et genus et nōmen inūtile :
Nīl pictīs timidus nāvita puppibus
Fīdit. Tū, nisi ventīs
Dēbēs lūdibrium, cavē !

Nūper sollicitum quae mihi taedium,
Nunc dēsīderium cūraque nōn levis,
Interfūsa nitentēs
Vītēs aequora Cycladas.